



Preschaints 52 votantas e votants

Tractandas

- 1 Tscherna dals scrutinadurs
- 2 Approvaziun da credits d'investiziun e dal preventiv d'investiziuns cumplessiv per l'on 2017
- 3 Approvaziun dal preventiv da success per l'on 2017
- 4 Approvaziun dal pè d'impostas per l'on 2017
- 5 Comunicaziuns e varia
 - 5.1 Comunicaziuns, orientaziuns ed infuormaziuns a regard progets actuals
 - 5.2 Infuormaziuns sur da rendaquints da credits approvats

Il president cumünal Emil Müller salüda a las votantas ed als votants a quista radunanza cumünala. El ha constatà cha la bannida es gnüda protramissa a temp. Cun quai vain approvada la glista da tractandas.

Il protocol no. 001/2016 dals 27 gün 2016 es stat publichà a temp. Infra il temp da publicaziun nu sun entradas ingünas protestas. Cun quai vala il protocol sco approvà.

Il preventiv es quel instrumaint cha la votanta e'l votant ha la pussibiltà da diriger las autoritats cumünalas. Quist instrumaint ha ragiunt amo plü gronda importanza cun quai cha'ls credits preschantats e sancziunats sur il quint d'investiziun sun eir deliberats e nu vegnan plü preschantats in üna radunanza da credit.

1 Tscherna dals scrutinadurs

Sco scrutinadurs in sala sun gnüts tschernüts Peider Bezzola ed Peider Andri Saluz.

2 Approvaziun da credits d'investiziun e dal preventiv d'investiziuns cumplessiv per l'on 2017

Il president da la cumischiun sindicatoria Arno Felix drizza ün pèr plets a la radunanza cumünala cun manzunar tanter oter cha'ls duos instrumaints preventiv dal quint da success e dal quint d'investiziun sun fich importants per ün cumün chi operescha cun munaida publica resp. cun raps e francs d'impostas. Tenor la cumischiun sindicatoria han ils respunsabels preparà il preventiv tenor meglder savair e pudair.

A la votanta ed al votant dess esser consciaint cha cun deliberar il preventiv vain data la legitimaziun als respunsabels d'agir in quel sen e da laschar far las investiziuns e da deliberar las sortidas büdschetadas. El giavüscha our a quel motiv da stübgjar critic il preventiv e da far dumondas.

Quai chi nu maina tuottafat inguotta es da dir davopro a la maisa raduonda a plondscher cha'l cumün detta oura massa blers raps. Minch'abitant chi ha l'impreschiun cha quai saja uschè, ha l'ocasiun da tour part a quista radunanza importanta e da dir seis parair.

La cumischiun sindicatoria propuona da deliberar il preventiv dal quint da success e dal quint d'investiziun per l'on da gestiun 2017 uschè sco ch'els vegnan preschantats. Eir sustegna ella la proposta a regard il pè d'impostas pel 2017.

Il president cumünal manzuna ils müdamaints ils plü essenzials chi s'han dats cun müdar dal quint armonisà 1 (HRM 1) sül quint armonisà 2 (HRM 2). Il müdamaint cun la plü grond'influenza es sgüra quel cha fin uossa gnivan scripturadas investiziuns sur 10 000 chf i'l quint d'investiziuns. In avegnir vegnan scripturadas be plü investiziuns sur 50 000 chf i'l quint d'investiziuns. Tuot tschellas investiziuns vegnan scripturadas i'l quint da success. Quai chi ha natüralmaing ün'influenza directa sül resultat final.

Ün oter müdamaint essenzial chi ha eir üna influenza directa sül guadogn sun las reglas d'amortisaziuns novas.

Implü vegn scritta giò tuot la facultà d'administraziun actuala linearmaing il plü lönch sur 12 ons a nolla. Invezza sto la facultà da finanzas adüna gnir scripturada per la valor dal temp o valor da marchà, quai chi ha consequenzas sül chapital agen dal cumün.

Credits resp. progets chi nu sun stats pussibels da preparar per la preschantaziun quista saira gnaran preschantats ad üna radunanza cumünala d'urant l'on 2017.

La suprastanza cumünala e la direcziun operativa han la lezcha da güdichar mincha proget e mincha credit a regard sia necessità, sia finanziaziun e sias consequenzas sül svilup da las finanzas cumünalas. Perquai s'ha eir da stumplar oura obain dafatta sepulir l'ün o l'oter proget.

Il preventiv dal quint d'investiziuns prevezza cuosts da 8'183'000 francs ed entradas da 2'233'000 francs. Las investiziuns nettas importan uschè s-chars 6 milliuns. Trat giò il cashflow da s-chars 2,2 milliuns francs resulta ün manco da finanziaziun da raduond 3,8 milliuns francs. Quist manco sto gnir cuverrà per gronda part cun novs credits da banca.

Sülla dumonda d'ün votant sto il president cumünal respunder chi nu s'es plü rivà da müdar oura la manisaziun dal glatsch artificial i'l 2016. Quist'investiziun gnarà fatta da prümavaira 2017. Il credit correspondent d'eira gnü concess da la radunanza cumünala dals 30 november 2015.

Approvaziun da progets/credits d'investiziun:

- | | | |
|----------------|----------------|--|
| ▪ 0290.5040.02 | 65'000 chf | Cul – büro per las Gestions Tecnicas |
| ▪ 0290.5090.80 | 125'000 chf | Sistem da gestiun, sorveglianza, controlla ed alarmaziun |
| ▪ 1500.5060.01 | 195'000 chf | Auto da salvamaint sün via (pumpiers) |
| ▪ 1500.5060.20 | 30'000 chf | Transporter da gruppa (pumpiers) |
| 1500.6310.00 | 56'000 chf (-) | Contribuziuns GVG |
| ▪ 1610.5000.01 | 20'000 chf | Sanaziun paraculla tir a schaubgia Arduond (stüdi) |
| ▪ 2170.5040.02 | 100'000 chf | Chasa da scoula Zernez – proget renovaziun |

Ün votant s'algora d'avair deliberà l'on 2015 ün credit da 100'000 chf per ün simil proget. El muossa eir via chi s'ha manà tras be avant pacs ons üna planisaziun da master per l'areal da la chasa da scoula e la chasa cumünala. El temma chi vain planisà sainza fin e quai in üna direcziun chi forsa gnanca nu's vuol. El intimescha a la suprastanza cumünala d'avair daplü ris-ch cun trar decisziuns.

Emil Müller declera cha'l credit deliberà als 30-11-2015 vaiva da chefar cullas lavurs da stüdi d'ideas dal «pilot II», per elavurar üna basa per ün program da planisaziun da territori i'l minz dal cumün da Zernez in viadi. Insembel cun quistas lavurs vegn per intant eir elavurada üna concorrenza d'ideas per la planisaziun da la renovaziun da la chasa da scoula. Subit cha quista lavur es a fin dess gnir surdat il prossem pass per la planisaziun in fuorma da preproget da la renovaziun da la chasa da scoula. Per pudair far quai immediatamaing e per na perder temp es previs quist credit. Previsibelmaing as saraja da prümavaira 2017 pront per quist pass.

- **3410.5010.80** 50'000 chf **Zernez-Susch – trassè loipa**
- **3410.5030.01** 60'000 chf **Plazza da sport/glatsch Zernez**

Ün votant manzuna d'avair manzunà fingià l'on 2015 la problematica cha na propcha blera munaida dal fondo da 5% da la CEE (Corporaziun Energia Engiadina) tuorna inavo in cumün. Perquai propuona el da far in quist connex üna dumonda da sustegn finanziel pro la CEE.

- **3412.5040.03** 60'000 chf **Iglüminaziun LED (Bogn da famiglia)**
3412.6310.00 30'000 chf (-) *Contribuziuns chantunalas*
- **3421.5010.00** 100'000 chf **Parkegis Pass dal Fuorn (PNS)**
- **3500.5040.00** 55'000 chf **Sanaziun sains clucher Lavin**
- **6150.5010.00** 200'000 chf **Via maistra - sanaziun**
- **6150.5010.06** 60'000 chf **Suot Baselgia-Viel – sanaziun**
- **6150.5010.60** 60'000 chf **Quadratschas – via da quartier**
- **6150.5010.80** 80'000 chf **Iglüminaziun publica**
- **7101.5031.80** 100'000 chf **Rimplazzamaint vascas da serra**
- **7201.5032.10** 25'000 chf **Zernez – sanaziun sarinera**
- **7301.5033.80** 50'000 chf **Sistem d'immundizchas MOLOC**
- **7900.5090.80** 50'000 chf **Planisaziun locala rodlanda**
- **7900.5090.82** 50'000 chf **Adressas novas a Brail, Zernez e Susch**
- **8110.5000.61** 22'000 chf **Separaziun dal pas-ch/god Dors – credit posteriur**
- **Augmaint dal credit resp. dal proget in seguit al svilup dal proget - dumonda d'augmaint dal credit per 1'600'000 chf**
 - 8190.5010.01 2'000'000 chf *Via God Munt Baselgia - sanaziun (30-11-2015)*
 - 8190.5010.02 500'000 chf *Via Güstizia-Zernez – sanaziun (30-11-2015)*
 - 8190.5010.02 2'100'000 chf *Via Güstizia-Zernez – sanaziun*
 - 8181.6620.00 1'470'000 chf (-) *Contribuziuns chantunalas*

Il president cumünal ha orientà in detagl sur da l'andamaint da quist proget cun muossar via sülla complexità da vulair cumbinar la sanaziun da las vias da god Munt Baselgia e Güstizia-Zernez cul proget d'incablamaint da lingias da forz'electricca tanter Pradella e La Punt.

La radunanza da preventiv dals 30 november 2015 vaiva approvà ün credit da 2'000'000 chf per la sanaziun da la via da god da Munt Baselgia ed ün credit da 500'000 chf per la sanaziun da la via da Güstizia fin Zernez. Quists duos credits sun gnüts preschantats a la radunanza cumünala a basa d'infuormaziuns da l'october 2015. I'l fratemp s'es prosegui cun prelavurs in connex cun quists duos progets, impustüt cun quel da Güstizia fin Zernez per resguardar las sinergias dal proget d'incablamaint da la forz'electricca tanter Scuol e Bever da las OEE SA.

Intant s'ha cun consternaziun stuvü tour a cogniziun cha'ls cuosts calculats da 500'000 chf per la via da Güstizia fin Zernez nu bastan per manar tras ün proget chi satisfa a las pretaisas ed als böts d'hozindi.

Invista a quista nouva situaziun ha la suprastanza cumünala decis da vulair proseguir seguaintamaing in chosa:

- a) schoglimaint dal credit oriund da 2'000'000 chf per la sanaziun da la via da Munt Baselgia stat concess als 30-11-2015
- b) augmaint dal credit per l'import da 1'600'000 chf da 500'000 chf (30-11-2016) sün nouv 2'100'000 chf per la sanaziun da la via da Güstizia – Zernez
- c) proseguimaint cul stüdi da sanaziun da la via da Munt Baselgia a regard gener da via, v.d. as far la dumonda, che dimensiuns chi fan propcha dabsögn e sen per quista via (larghezza, tonnascha etc.) e lura preschantaziun d'ün ulteriura dumonda da credit correspudenta in üna radunanza cumünala futura

Fundamentalmaing es da resguardar cha per la sanaziun da la via da Güstizia – Zernez as po far quint cun contribuziuns chantunalas ill'otezza d'almain 70%. Uschè chi's prevezza cuosts nets e finals a charg dal cumün per quist proget i'l import da 630'000 francs. La part cha las OEE SA contribuiscan vi da quists cuosts per la part chi pertocca il traget cumünavel da la via e l'incablamaint dal cabel da forz'electricca nun es amo trattada a fin.

▪ 8181.5010.10	50'000 chf	Via Selva - sanaziun
8181.6620.00	22'000 chf (-)	Contribuziuns chantunalas
▪ 8181.5010.42	50'000 chf	Via Grialetsch – sanaziun da la punt
▪ 8181.5090.00	50'000 chf	Miglioraziun
▪ 8290.5060.00	63'000 chf	Gestiun cumünala – veiculs novs
▪ 8711.5034.00	50'000 chf	Rimplazzamaint cabinas da scumpart
▪ Dumonda da credit complessiv i'l import dad 1'800'000 chf		
8711.5034.04	300'000 chf	«EW Nord» - investiziuns i'l provedimaint electric Zernez

In üna prüma votaziun finala ha la radunanza cumünala approvà cun unanimità da vuschs ils singuls credits d'investiziun sco gnüts preschantats i'l preventiv dal quint d'investiziun 2017. Cun quista decisiun es dat glüm verda a la realisaziun dals progets.

In üna segunda votaziun finala ha la radunanza cumünala approvà cun unanimità da vuschs il preventiv dal quint d'investiziuns 2017 preschantà.

Il preschaint vicepresident da la fundaziun dal Parc Naziunal Svizzer, Armon Vital s'ha ingrazchè in nom dal PNS per l'approvaziun dal credit a regard ils parkegis lung la via dal Pass dal Fuorn.

3 Approvaziun dal preventiv da success per l'on 2017

Il manader da finanzas ha preschantà il preventiv dal quint da success chi prevezza cun sortidas da 17'461'200 chf ed entradas da 18'145'600 chf ün guadagn da 684'400 francs. Ils augmains marcants da cuosts i'l quint da success in congual culs ons avant sun pro la scoula e l'incharg da l'egualisaziun da finanzas. I'l quint da success sun previsa amortisaziuns dad 912'800 chf e deposits a las finanziaziuns specialas dad 595'400 chf. Il guadagn implü las amortisaziuns e'l müdamaint da las finanziaziuns specialas fuorman il cashflow chi importa previsibelmaing 2'192'600 chf.

Il preventiv da success es ün instrumaint da lavur impegnativ per la direcziun operativa, sco eir per tuot las collavuraturas e collavuratur. La gestiun finanziaria dal Cumün da Zernez vain manada tenor quist preventiv, regardond las cumpetenzas financialas dals singuls gremis.

La radunanza cumünala ha approvà sainza entrar illa discussiun cun unanimità da vuschs il preventiv dal quint da success 2017 preschantà.

4 Approvaziun dal pè d'impostas per l'on 2017

Il pè d'impostas armonisà pel cumün fusiunà importa 84% da l'imposta chantunala. Regardond la situaziun finanziaria actuala nu daja pel mumaint motivs per augmentar o per redüer il pè d'impostas.

La radunanza cumünala ha approvà sainza cuntravusch il pè d'impostas dad 84% per l'on 2017.

5 Comunicaziuns e varia

5.1 Comunicaziuns, orientaziuns ed infuormaziuns a regard progets actuals

Divers respunsabels da progets han infuormà sur dals progets plü gronds actualmaing in trais-cha.

5.1.1 Proget «chasa da scoula Zernez»

I'l rom dal proget "pilot II" sun pel mumaint quatter gruppas dad experts (architects, indschegnars d'energia, architects da la cuntrada, architects per la fabrica da citats) landervia ad elavurar üna basa per ün program da planisaziun da territori i'l minz dal cumün da Zernez. Insembel cun quistas lavurs vegn eir

elavurà üna concurrenza d'ideas per la planisaziun da la renovaziun da la chasa da scoula. Parallel a quistas lavurs han specialists per planisaziun da spazi da scoula miss insembel ün program da spazi per la chasa da scoula. Subit chi's ha las infurmaziuns da la concurrenza d'ideas (prümavaira 2017) esa previs il prossem pass da planisaziun. Quai es sco prüma ün preproget. No sperain fich dad avair fingià our da la concurrenza d'ideas diversas parts pel preproget. La surdatta dal preproget es previsa pel principi stà 2017. Cun quist preproget as po lura scriver oura las lavurs da proget d'elavuraziun. Quist pass es previs per la prümavaira 2018. Uschea as po tgnair aint il program previs l'on passà per cumanzar cun las lavurs da renovaziun l'on 2019.

5.1.2 Proget «Zernez Energia 2020»

Illa descripziun dal proget Energia 2020 esa defini, cha la munaida chi's inchascha sur il consüm da forz'electricica chi s'amunta minch'on a ca. 150'000 chf gnia per gronda part restituida a la populaziun in fuorma da sustegn per renovaziuns energeticas. Illa fasa da proget d'eira insomma previs cha'l cumün prefinanziess il proget. In quella fasa as ha eir dovrà diversa munaida per manar il proget, però eir per til far cuntshaint intern in cumün ed eir extern. Il proget ha gnü grond rebomb e quai impustüt eir a l'extern. Diversas instituziuns ed organisaziuns interessadas sun statta a Zernez per as laschar infuormar sur da l'agir. Uossa però es la fasa da proget a fin e la munaida ramassada sur il predsch da consüm d'energia electrica illa fracziun da Zernez implischa il fondo. Davo cha'l proget sves es terminà culla fin da l'on 2015 as ha eir redüt l'ingaschamaint da la coordinatura e da l'administraziun dal proget. I's bada ferm cha'l proget es cuntshaint illa fracziun da Zernez. Id aintra üna discret gronda quantità da dumondas da sustegn. Pel mumaint es la somma da munaida chi vegn inchaschada l'on 2016 fingià darcheu datta oura in fuorma da sustegn per sanaziuns energeticas e per pajar inavo al cumün la part da sia prefinanziaziun.

La dumonda scha quist proget es limità e cun quai sch'el va eir üna jada a fin po il president cumünal comunicar cha la radunanza da l'anterior cumün da Zernez nu vaiva decis üna finischun dal proget. Actualmaing as po constatar interess vi dal proget e cha patruns da fabrica pon eir trar a nüz las contribuziuns our dal fondo da proget. Emil Müller pudess eir as metter avant da schlargiar il proget süllas ulteriuras trais fracziuns Brail, Susch e Lavin.

5.1.3 Proget «Ouvra electrica Sarsura»

Il proget per la realisaziun da l'ouvra electrica illa Val Sarsura po proseguir. Als 25 october 2016 ha la regenza dal Chantun Grischun concess il permiss da fabrica. Il prossem pass es da prochatschar la conferma da sustegn tras la KEV da la Swissgrid. Pür cun quist acconsentimaint po e vain realisada l'ouvra. Sün che data chi's po preverer quista conferma nu's po amo güdichar.

5.1.4 Proget «Provedimaint d'aua Eras Sura e Funtanivas»

Las funtanas d'Eras Sura e Funtanivas nu funcziunan uschè bain. La funtana d'Eras Sura es daspö l'avrigl da quist on sainza furniziun d'aua. La funtana Funtanivas furnischa fich irregular, uschè cha nus stuvain far üna sanaziun plü gronda per pudair garantir üna furniziun d'aua regulara.

La suprastanza sto deliberar in quist cas ils credits correspondents, schi nu va oter in sia cumpetenzza, per pudair agir a bön da la furniziun d'aua da baiver per la fracziun da Lavin. Cur chi's ha la survista da cuosts effectivs, as varà da preschantar üna dumonda posteriura da credit ad üna radunanza cumünala futura.

5.1.5 Proget «Provedimaint central da chalur e localitats pel cumün e pels pumpiers in Cul»

Il proget vain manà inavant cun scriver oura las incumbenzas da planisaziun. Ün güdicat d'emissiuns da canera es in elavuraziun. Prosmamaing vain manada tras la procedura da dumonda da fabrica. La fabrica da la centrala e da la halla nouva dal provedimaint central da chalur es previsa pel 2017. In seguit vain lura tut per mans l'adattamaint dals stabels existents.

5.2 Infuormaziuns sur da rendaquints da credits approvats

Tenor HRM2 es il cumün in dovair da preschantar al suveran ils rendaquints da credits approvats in fuorma adequata. La suprastanza cumünala ha decis da vulair far quai, scha mâ pussibel, adüna illa radunanza cumünala da preventiv.

0290.5040.00 81'000 chf Center cumünal - adattamaints

Il credit i'l import dad 81'000 chf per la fabrica da müdamaints ed adattamaints da divers büros i'l plan terrain (fanestrigl) i'l Center cumünal in seguit a la fusiun da cumüns es gnü concess illa radunanza cumünala dals 15 december 2014. I'l fratemp es la fabrica terminada ed ils cuosts finals sun cuntshaints. Ils cuosts totals s'amuntan ad 85'967.55 chf. Il credit es gnü surpassà per + 4'967.55 chf, v.d. per 6,13 %.

8110.5000.61 46'500 chf Separaziun dal pas-ch God Dors

Il credit i'l import da 46'500 chf per la separaziun dal pas-ch in God Dors illa fracziun da Lavin es gnü concess illa radunanza cumünala da l'antierur Cumün da Lavin dals 11 december 2012. I'l fratemp es la fabrica terminada ed ils cuosts finals sun cuntshaints. Ils cuosts totals s'amuntan ad 68'166.50 chf. Il credit es gnü surpassà per + 21'666.50 chf, v.d. per 46.59 %.

Per quist surpassamaint da cuosts vegn preschantada üna dumonda da credit posteriura i'l rom dal preventiv d'investiziuns 2017.

8181.5010.40 200'000 chf Via Crap Alb - sanaziun

Il credit cumplessiv i'l import da 200'000 chf per la sanaziun da la via Crap Alb a Susch es gnü concess in duos dumondas da credit i'l 2013 (100'000 chf) ed i'l 2014 (100'000 chf) da la radunanza cumünala da l'antierur Cumün da Susch. La fabrica ha gnü lö in duos fasas d'urant l'on 2014 e 2015. I'l fratemp es la fabrica terminada ed ils cuosts finals sun cuntshaints. Ils cuosts totals s'amuntan ad 162'666.97 chf. Il credit es gnü suotpassà per – 37'333.03 chf, v.d. per 18,66 %.

Ün votant remarcha cha'l proget da la sanaziun da la via da Crap Alb saja gnü serrà giò be malamaing. Las ultimas lavurs paran d'esser gnüdas fattas be a mezzas. El as giavüschess chi gnia fat uorden in quist lö, chi gnia tagliada oura la senda „Truoi dals troglodits“ chi cuntinua e chi gnia fat alch meglder per traversar a pè l'aua dal Laviner Crap Alb sülla via manzunada. Il president cumünal conferma il dischuorden ed imprometta d'ir davo a la chosa.

8181.5010.41 123'000 chf Via da Sandögna e Nusch - mantegnimaint

Il credit i'l import da 123'000 chf pel mantegnimaint da la via da Sandögna e da Nusch a Susch es gnü concess illa radunanza cumünala dals 15 december 2014. I'l fratemp es la fabrica terminada ed ils cuosts finals sun cuntshaints. Ils cuosts totals s'amuntan a 131'051.25 chf. Il credit es gnü surpassà per + 8'051.25 chf, v.d. per 6,54 %.

8200.5060.00 150'000 chf Rinch da maschinas forestalas (RMI)

Il credit i'l import da 150'000 chf per la partecipaziun i'l rinch da maschinas forestalas Engiadina Bassa (RMI – Rinch da maschinas intercumünal), e quia in special per la cumpra d'ün grü ad alber per trar laina, es gnü concess illa radunanza cumünala da preventiv dals 30 november 2015. I'l fratemp es la macchina cumprada ed eir fingià statta in acziun. La partecipaziun s'amunta a 150'000.00 chf.

8290.5060.00 52'000 chf Gestiu cumünala – veicul nouv

Il credit i'l import da 52'000 chf pel rimplazzamaint dal veicul cumünal (Toyota cotschen) es gnü concess illa radunanza cumünala dals 15 december 2014. I'l fratemp es il veicul (Toyota Hilux alb) cumprà ed in funcziun. Ils cuosts totals s'amuntan a 42'952.75 chf. Il credit es gnü suotpassà per – 9'047.25 chf, v.d. per 17,39 %.

Giubilars

Il president ha orientà sur da trais giubileums d'ons da servezzan da persunal cumünal i'l 2016.

Jon Andrea Filli sco gestiuner da las sarineras ha pudü festagiar als 1. november seis 25-avel giubileum. Arno Fliri sco collavuratur da la gestiun forestala als 1. avrigl 10-avel e Domenic Scandella sco manader da la gestiun dal Bogn da famiglia her, als 1. december seis 10-avel on da servezzan. Als trais giubilars ingrazcha il president per la fideltà e per l'ingeschamaint pel cumün d'urant quist lung temp.

Nina Padrun – emischium da televisiun „Landfrauenküche“ da SF

A Nina Padrun da Lavin vain gratulà per sia seguonda piazza ill'emischium da televisiun „Landfrauenküche“ da l'emitor Svizzer da televisiun SRF. Cun quist'emischium ha ella e seis confamiliars fat bella e gronda recloma per nos cumün e per la regiun.

Manader da las Gestions Tecnicas

Sco nouv manader e successur d'Alfred Barbüda es gnü elet Fadri Guler da Brail. El cumainza sia piazza da lavur pro'l cumün süls 1. avrigl 2017.

Iniziativa dal pövel dals 30-6-2016

Als 30 gün 2016 es entrada ün'iniziativa dal pövel, gnüda suottascritta da 105 votantas e votants, chi ha il böt d'adattar la ledscha da fabrica e las prescripziuns da zonas in quella fuorma, chi nun es plü pussibel da s-chaffir novas pussibilitats d'elavuraziun, d'explotaziun e da depositar materials da fabrica (primars e da s-chart) in nos cumün. Quista pretaisa dess valair per la nouva zona in Cul, ma eir per tuot las otras zonas o eventualas novas zonas da mansteranza in cumün.

La suprastanza cumünala es landervia ad elavurar l'iniziativa. Quai voul dir chi'd es da manar tras üna procedura da revisiun da la planisaziun locala resp. da l'uorden fundamental. Previsibelmaing as voul manar la tractanda a la radunanza cumünala da l'avrigl 2017 e davo lura amo a la votaziun a l'urna da la fin da mai 2017.

Sanaziun da la via da Champatsch/Saglias Lungias

La sanaziun da la via manzunada, gnüda concess da la radunanza cumünala dals 30 november 2015, s'ha siteda causa chi's es uossa landervia a trattar culla Viafier Retica a regard la sanaziun dal suotpassagi dal binari. Cun trar a nüz sinergias as pudess schoglier divers problems plü vegls in quist lö.

Varia:**Viadis dal bus da scoula**

Üna votanta as fa pissers pels scolars chi nu rivan adura sül bus da scoula ed han lura da spettar lösch sül prosem bus e quai be suletins. Ella pretenda üna resposta davart dals respunsabels. Il president dal cussagl da scoula Jachen Gaudenz nun es infuormà sur da la problematica. El ha surtut quista pendenza.

Proget da sanaziun da la via maistra illa fracziun da Zernez

Ün votant as fa pissers cha'l trafic tras la fracziun da Zernez gnia plü svel, scha'l proget da sanaziun previs i'ls prosemms ons nu piglia bain avuonda resguard sün quista problematica.

Suotpassagi dal binari da la VR in Champatsch/Saglias Lungias

Üna votanta dumonda, schi nu's pudess preverer ün passaman i'l suotpassagi per cha persunas plü veglias e/o na plü uschè bain in chomma possan as tgnair, i'l cas chi vess da dar darcheu glatsch in quist lö.

Adöver da la sala da gimnastica

Ün votant remarcha cha sia dumonda a regard l'adöver da la sala da gimnastica d'urant las vacanzas da scoula d'utuon e da prümavaira nu saja amo gnüda respusa. Il president cumünal conferma quist fat ed imprometta da tour per mans la chosa.

Privel d'accidaints in Scheschna

Ün votant muossa via sül grond privel d'accidaints al lö da l'imboccadüra da la via da Scheschna (Foffa Conrad/Duschletta) illa via chantunala dal Pass dal Fuorn. In quist lö fess sen da diminuir il privel per evitar accidaints plü gronds. Emil Müller manzuna cha la pulizia chantunala haja tut sü quista problematica. Per cha'ls respunsabels dal chantun possan lavurar inavant faja dabsögn ün'incumbenza dal cumün. Davart dal cumün vegn spettà dals pertocs ün'intimaziun obain üna dumonda ufficiala per pudair agir inavant invers il chantun.

Il medem votant intuna da nu vulair chi's diminujscha in general la limita maximala sülla via dal Pass dal Fuorn dad 80 sün 60 km/h !

Il president cumünal ingrazcha als preschaints per la cumparsa e per l'interess demuossà, giavüscha a tuots ün bel temp d'Advent ed invida ad ün aperitiv.

Il president



Emil Müller



Il chantlist



Corsin Scandella

Dürada da la radunanza:
20:00h fin 22:00h

Publicaziun dal protocol:

20 december 2016 fin 19 schner 2017.

Protestas cunter quist protocol sun d'inoltrar in scrit fin als 19 schner 2017 a la suprastanza cumünala dal Cumün da Zernez.